


PAROKIA DI SAVANETA TA ORGANIZA HOMENAJE NA SAGRADO CURAZON DI HESUS



ORANJESTAD(AAN): -- Parokia di Savaneta a organiza recientemente, un evento yama "Homenaje di Curazon pa Curazon".

Ta trata aki di un show di cancionnan na honor di Sagrado Curazon di Hesus, patrono di Parokia di Savaneta.

Intencion tras di e show tabata ta pa haya algun cantica nobo di Sagrado Curazon di Hesus, den cuadro tambe di e di cien aniversario di Parokia di Savaneta.

Tabata tin un total di dies-cuatro cancion nobo, kirbi pa varios compositor.

Compositor Ronny Kock a participa cu e cancionnan "Paloma Blanco", "Sagrado Curazon di Hesus" y "Curazon Sagrado di Hesus".

Compositor Jane Lanooij a participa cu e cancionnan "E regalo di Sagrado Curazon" y "Oh, Sagrado Curazon di Hesus".

Randy de Kort, Rita Lampe-Jansen, Sahit Dijo y Vivo Croes ta participa respectivamente cu "Mi kier canta", "Nos gran patrono", "Sagrado Curazon" y "Sagrado Curazon Su mensahe".

Eloy Koolman a kirbi e cancion "Sagrado Curazon di Hesus y Tani Henriquez "Pa-bien nos Parokia" y "Nos Parokia".

Norma Martijn-Stephens finalmente a participa cu su cancionnan "Pidi pa nos, Curazon di Hesus" y "Sacred Heart of Jesus".

Cantantenan tabata Willy

Willems, Amanda Singh, Jennifer Paesch, Sherida Paesch, Izaira van der Linde, Kayla Maduro, Joselyn Maduro, Veronica Hunt, Kathy Hunt, Sue Ann Luidens, Jillyan Bisslik, Kareline van der Linde, Jose Gafaro, Kathleen Slikker, Ana Teresa Tromp, Bengiomar Panneflek, Andra van der Linde, Alfred Kock, Giovanni Croes, Darice Solognier, Alfred Kock, Cherokee Koolman, Stacey Koolman, Ghislaine de Cuba, Jennely Croes, Geraldine Geerman, Jurryenne Ras, Josanne Kock, Gail Tromp y Dennis Ras-mijn.

Riba fotonan, momentonan durante e evento.

Columna di Finchi

Viuda stranhero a keda cu propiedadnan di famia Arubiano

Na mas di un ocasion DIARIO a yega señal a inconveniencianan cu cierto famianan ta haya nan mes aden, despues di casamento cu un of otro dama of cabayero di otro pais sin cu ta haci areglonan previo pa asunto di herencia y propiedadnan.

Hopi ta esnan cu ta analiza y te hasta busca conseho y orientacion ora di bay dal un stap asina delicado manera casamento.

Manera tur hende sa, no ta tur hende ta casa cu sinceridad den nan curazon, y asina tin matrimonionan riba un base di interesnan personal egoista.

E sorto di casamentonan aki hopi biaha ta sconde nan intencion berdadero y despues ta resulta cu e proposito tras di tur esaki tabata nada otro cu casa pa interes.

Un famia Arubiano biba na Sabaneta a aserca DIARIO pa splica con nan propiedadnan a bay para na man di un dama di otro nacionalidad.

"Cas y demas tereno, propiedadnan y un magasin cu tabata recuerdo cu antepasadonan mes a traha serca di nan cas a bay pa e Señora aki".

"Cosnan a cuminsa cambia hopi pa e famia aki cu semper tabata biba felis y contento na nan cas, te despues cu un di e miembro di famia (awe difunto for di dos aña pasa) a casa cu un dama di nacionalidad dominicano.

Apenas nan a casa, cu cada vez e muher tin cu bay Santo Domingo, y ta laga sa cu ta malo e ta y tin cu keda pa casi cinco luna aya.

Famia na su pais ta trahando cas y e ta biaha continuamente hiba placa pa nan.

Durante e lunanan cu e dama tabata biaha, e casa tabata keda na man di famianan, kendenan tabata percura pa su cuminda y necesidad y te hasta tabata hib'e dokter y atende cu su remedinan te dia cu el a muri dos aña pasa.

Despues cu e señora aki a keda cu tur propiedad, derecho pa haya pension di viuda tambe.

Awor e no sa tampoco con pa tene tur cos limpi y na ordo rond di su cas y di demas famia den sercania cu semper a sa con pa tene lugar limpi.

E problema grandi cu tin andando awor ta e tantísimo sushedad, cu tin tur caminda rond di e cas y como cu nos ta biba serca como bisña nos ta worde afecta masha hopi mes.

E casnan ta hopi serca di otro y for di unda cu nos ta nos tin cu weita djakanan ta move tur caminda, raton y kakalakanan na cantidad.

Tin un saco basta grandi yen di sushedad pa mas cu cuatro luna poni un banda cu ta trece tur e insectonan y por weita pushinan tambe ta cana rond.

Galiñanan y gai mara na palo ta muri hamber, pasobra nan ta haya nada pa come of bebe. Zinc cu palonan bieu ta worde uza y ta claban tur caminda na e cas dunando un bista mahos". "Te hasta e famianan na e otro banda, nos mesun famia ta worde molestia cu e manera aki di biba.

Un sushedad increible, na unda te hasta Salubridad Publico a worde poni na altura sin cu nan a haci algo.

Nos tin un yiu cu ta un baby ainda y nos no por expone su salud ni esun di nos na tur e sushedadnan cu por haci nos malo. E ta tristo con tur bisña tin cu para wak tur e cosnan aki, principalmente mi mama cu ta un hende grandi di setenta y

cuatro aña cu ta sufi ora cu e ta wak sorto di cosnan asina cu como Arubiano nos mes no ta custumbra cu e sistema di biba aki.

E Señora ta dañando un bario completo consistiendo di famianan Arubiano cu ta siendo perhudica pa e manera anti higienico di biba aki, despues cu nan a bin haci doño di tur propiedad cu aprobacion di Gobierno cu a dun'e un man.

Nos kier a pidi Salubridad Publico, si nan ta asina bon di pasa controla e sushedad den cual nos como Arubiano tin cu biba, na man di e Señora aki, mi nomber y adres ta conoci na redaccion.

Hopi hende ta bisa cu casi nan no por kere loke ta pasando na e parti patras cu tabata propiedad di e famia aki di cual ami ta un miembro.

Te hasta ex ministro di gobierno anterior a keda sorprendi di loke a para bira di nos lugar y propiedadnan y toch gobierno actual a duna tur aprobacion pa e hendenan aki haya papel den nan man y awe nan ta doño di loke tabata pertenece na nos famianan y antepasadonan Arubiano".

Lectornan por yama DIARIO na e number di telefon 826747, pa publicacionnan confidencial den Columna di Finchi, manda carta cu nomber y adres of pasa personalmente na redaccion.